

Script of Evening Gojri News Bulletin 02 August 2026 at 1700 Hrs

ایوننگ گوجری نیوز بلیٹن مو رخہ 02 اگست 2026

Headlines

یوہ آکا شوانی جموں ہے عبدالمجیدتیں خبر سٹو پہلاں خاص خبر۔

*1-لیفٹنٹ گورنر منوج سنہا نے نشہ مُکت یوا فار وکست بھارت سنکلیپ ابھیان مانہہ شرکت کی تے کہیو جے جموں کشمیر غا نوجواناں نانہہ ترقی یافتہ بھارت غو ترقی انجن بننو چاہیے۔

*2-راجو ری غا نکھل سُودن نانہہ اج مُلک گیر " نشہ مُکت یوا فار وکست بھارت سنکلیپ ابھیان" غا آغاز غا موقع ور وزیر اعظم غی طرفوں جاری کیا گیا سرکاری قومی مہم غا اشتہار مانہہ دسیو گیو ہے۔

*3-بھارت پاکستان نانہہ اک ہور بڑو دھچکو دین غی تیاری کر رہیو ہے کیونجے اُجھ کثیر مقصدی منصوبہ غو نظر ثانی شدہ سروے مکمل ہو گیو ہے۔

*4-وادی کشمیر مانہہ حالیہ دہشت گردی غا واقعہ غے باوجود امرناتھیا تریاں غا جذبہ تے عقیدت مانہہ کمی نہیں آئی ہے تے یا ترا جاری ہے۔

*5-تے آئندہ 7 تیہاڑاں غے دوران جموں کشمیر مانہہ رُک رُک غے گرج چمک نال با رش غو امکان ہے۔

خبراں غی تفصیل نال پہلاں محمد امین انجم۔

LG Nasha Mukht

لیفٹنٹ گورنر منوج سنہا نے سکاسٹ کشمیر مانہہ یوٹی سطح غا نشہ مُکت "یوا فار وکست بھارت سنکلیپ" ابھیان مانہہ شرکت کی۔ اس موقع ور بولتاں واں اُنہاں نے کہیو جے وزیر اعظم نریندر مودی غی قیادت غے تحت 100 ہفتہ مہم نوجواناں نانہہ باختیار بنان، نشو ختم کر غے تندرست نظم وضبط آلو تے ترقی یافتہ بھارت بنان غی پُکار ہے۔ لیفٹنٹ گورنر نے کہیو جے جموں کشمیر مانہہ نشہ غی کوئی جگہ نہیں ہے۔ موصوف نے مزید کہیو جے جموں کشمیر غا نوجوان نانہہ لازمی طور ور ترقی یافتہ بھارت غو ترقی انجن بننو ہے۔ لیفٹنٹ گورنر نے کہیو جے 100 روزہ نشہ مُکت مہم غے دوران 2 ہزار 3 سو تیں متا معاملہ درج کیا گیا، جد کہ 2 ہزار 6 سو گرفتاریں کر غے 1 ہزار 5 سو کلو گرام منشیات ضبط کی گئی۔ لیفٹنٹ گورنر نے اس راہ کہیو۔ بائٹ۔۔۔

Rajouri Nasha Mukht

ضلع انتظامیہ راجوری نے مائی بھارت غا تعاون نال ڈاک بنگلو راجوری مانہہ وزیر اعظم گا ورچول گل با تی پروگرام غو انعقاد کیو۔ اس سلسلہ مانہہ ضلع پھر تیں 2 سو تیں متا نوجوانان نے پروگرام مانہہ شرکت کی تے براہ راست پروگرام دیکھیو۔ اس موقع ور ڈپٹی کمشنر راجوری ابھشیک شرما خاص طور ور موجود تھا۔ اس ضمن مانہہ پروگرام آلی جگہ اک بڑی آئی ای ڈی سکرین نصب کی گئی تھی۔ جت پروگرام مانہہ حصول لین آلاں نے وزیر اعظم نانہہ سنیو، کیونجے وزیر اعظم نے ملک گیر "نشہ مُکت یوا فار وکست بھارت سنکلب" ابھیان شروع کیو۔ پروگرام غے دوران تمام حصول لین آلا افراد نے وی نشو ختم کر غے نشہ تیں آزاد سماج آلیے پاسے کم کرن غو حلف لیو۔ اس سلسلہ مانہہ بور متی جانکاری دیتاں واں ڈی سی راجوری ابھشیک شرما نے اس راہ کہیو۔ بائٹ۔۔۔

Rajouri Boy

ضلع راجوری واسطے اک لمحہ فخریہ مانہہ سرکاری ہائر سکینڈری اسکول غا 12 ویں جماعت غا نکھل سودھن نانہہ سرکاری قومی مہم اشتہار جاری کرن بارے نمایاں طور ور شامل کیو گیو تھو۔ نکھل نے پچھلے سال وزیر اعظم نال نویں دہلی مانہہ ملاقات کی تھی تے قومہ مہم مانہہ اُن نانہہ شامل کرنو راجوری غا لوکاں واسطے اک فخر آلو معاملو ہے۔ نکھل غی حصولیابی غی تعریف کرتانواں سرکاری لڑکاں غا ہائر سکینڈری اسکول غا اک اُستاد نے اس راہ کہیو۔ بائٹ۔۔۔

Land Sinking Poonch

جموں کشمیر غا پونچھ ضلع غی مینڈھر سب ڈویژن غا سروٹی جبراں گراں مانہہ زمین دھنسن غا کئی واقعہ پیش آ گیا، جن غی وجہ نال اک اسکول غی عمارت اور کئی رہا نشی گھراں نانہہ نقصان پُجیو ہے۔ عہدیداراں نے کہیو ہے جے کئیں ڈھانچہ ڈھ گیا، جد کہ باقی بچیا گھراں مانہہ دریڑ آگئیں تے بور نقصان غو ڈر ہو گیو ہے۔ متاثر گُنبان نانہہ مجبور کیو گیو جے ویں گھراں نانہہ خالی کریں، کیونجے زمین لگاتار دھنس رہی ہے۔ باشندان نے ضلع انتظامیہ نانہہ اپیل کی ہے جے فوری طور ور گُنبان نانہہ کسے محفوظ تھار منتقل کیو جائے تے اک جیا لوجیکل جائزو منعقد کرن اور اُن متاثرین نانہہ مناسب معاوضو دتو جا ئے نالے اُن غی باز آباد کاری کی جائے۔ اس سلسلہ مانہہ انتظامیہ صورتحال غی نگرانی کر رہی ہے۔

مزید خبراں نال عبدالمجید ور اُس تیں پہلاں یوہ سنیو۔

Ujh Project

طویل انتظار شدہ کثیر المقاصد اُجھ پروجیکٹ غا سروے آلو کم مکمل ہو گیو ہے۔ اس سلسلہ مانہہ مرکزی آبی وسائل تیں سینئر عہدیداراں غی طرفوں اگست غا پہلا ہفتہ مانہہ ضلع کٹھوعہ غو دورو متوقع ہے۔ جل شکتی وزارت غی تکنیکی مشاورتی کمیٹی نے پہلاں ہی اس پروجیکٹ نانہہ منظوری دے دتی ہے۔ اس سلسلہ مانہہ 11 ہزار 9 سو 7 کروڑ روپیاں غا پہاری بجٹ غے باوجود پروجیکٹ نے سلامتی نقطہ نظر تیں وی اپنی افادیت مرکزی سرکار نانہہ ثابت کر دتی ہے۔ پروجیکٹ بارے جانکاری سانجھی کرتاں واں مرکزی وزیر ڈاکٹر جتندر سنگھ نے اس راہ کہیو۔ بائٹ۔۔۔

SANJY Devotees

کشمیر مانہہ حالیہ دہشت گردی غا واقعات غی وجہ تیں اس وقت جا ری شری امرناتھ یاترا واسطے حفاظتی اقدام مزید تگڑا کر دتا گیا ہیں ۔ سلامتی اہلکاراں نانہہ بڑی تعداد مانہہ تعینات کیو گیو ہے ، سخت نگرانی تے کئی جگہیں گڈیاں غی تلاشی کر غے یا تریاں غی حفاظت نانہہ یقینی بنایو گیوہے ۔ دہشت گردی غی بزدلانہ کا روائیاں غے باوجود عقیدت منداں غو جذبہ کھٹ نہیں ہوئو ہے ۔ بابا برفانی غا درشن کر غے واپس آرہیا تے درشن کرن واسطے جا رہیا یا تریاں نے ادھم پور مانہہ آکاشوانی نیوز نال گل کرتاں واں کہیو جے اُن غو جوش تے حوصلو ہمیشہ غی طرح مضبوط ہے تے دہشت گردی غو کوئی وی عمل ان غی عقیدت نانہہ کمزور نہیں کر سکتو تے نہ ہی اس پوتر یا ترا نانہہ روک سکے ۔ اُن گو کہنو تھو ۔۔ بائٹ۔۔

Weather

محکمہ موسمیات نے آئندہ 7 تہاڑاں غے دوران جموں کشمیر مانہہ رُک رُک غے تے گرج چمک نال بارش ہون غی پیشنگوئی کی ہے ۔ جموں کشمیر غا کئی علاقہ مانہہ عام طور ور بعد دوپہر تے شام غے وقت بارش ہون غو امکان تے چھڑی لگن غو کوئی امکان نہیں ہے ۔ حالانکہ محکمہ نے دسیو ہے جے تھوڑا چر واسطے تیز بارش ، بدل پھٹن تے چان چک سیلاب آن گو اندیشو ہے ۔ حکام نے خبردار کیو ہے جے جموں سرینگر قومی شاہراہ ور پتھر آسکیں، مٹی غا تودا تے زمین کھسک سکے ۔ مسافراں نانہہ مشورو دتو گیو ہے جے وے سفر غی منصوبہ بندی کرن تیں پہلاں موسم تے ٹریفک محکمہ غی ہدایات ور عمل کریں۔ اس بارے محکمہ موسمیات غا عہدیدار نے مزید اس طرح دسیو ۔۔ بائٹ۔۔

اس غے نال ہی خبراں غو یوہ بلیٹن ختم ہوئو۔